

Uunga siunnersuut: Aningaasaliisunut aningaasalersuisunullu qularnaveeqqusiinermi aningaasaateqarfik pillugu allannguissamat Aaqqiissutip atuutilernissaanut Namminersorlutik Oqartussat oqaaseqaatissaannut Inatsisartut aalajangiiffigisassaat.

(Aaqqiissutip aaqqiissut atuuttoq nr. 137, 9. marts 2005-imeersoq aningaasaliisut aningaasaliisunut aningaasalersuisunullu qularnaveeqqusiinermi aningaasaateqarfik pillugu inatsisip Kalaallit Nunaannut atuutilernissaanut nutarterneraa).

(Inuussutissarsiornermut Suliffeqarnermullu Naalakkersuisoq)

Tunngavilersuut

Aningaasaliisunut qularnaveeqqusiinermi aningaasaateqarfik suliffeqarfiuvoq namminersortoq imminullu pigisoq, inatsisitigut pilersinneqarsimasoq. Aningaaserivinni aningaasaliisut aningaasalersuisullu akiliisinnaajunnaarnernut atatillugu annaasaqarnerinut erseqqinnerusumik aalajangersaanikkut taarsiiffigineqartarnerat taassuma siunertaraa.

Aningaasarsiornerup ajutoomerata kingunerisaanik danskit inatsisaanni aningaasaliisunut aningaasalersuisunullu qularnaveeqqusiinermi aningaasaateqarfimmi aningaasat amerlassusiisa killingat kr. 300.000-iusut kr. 750.000-inut amerlineqarput, tak. inatsisitigut nalunaarut nr. 794 ulloq 20. august 2009-meersoq, aningaasalersuinnermut tatiginninnerup pilerseqqinnissaa siunertaralugu.

Allannguutit danskit aningaaseriviini sullitat Kalaallit Nunaanni aningaaseriviini sullitanut naleqqiullugit aningaaseriviit akiliisinnaajunnaassagaluarpata taamaalillutik pitsaanerujussuarmik inissisimalerput.

Kalaallit Nunaanni aningaaseriviit unammillersinnaassusiat eqqarsaatigalugu, taamatullu aningaaserivinni sullitat uninngasuutaasa isumannaarniarlugit sammisami malittarisassat atuuttut nutarterneqarnissaat pisariaqalerpoq, taamaalilluni danskit malittarisassaattut assinganik inissisimatinneqalissallutik. Taamaangippat naatsorsuutigineqartariaqarpoq Kalaallit Nunaanni aningaaserivinni sullitat amerlasuunik uninngasuuteqartut uninngasuutitik Danmarkimi aningaaserivinnut nuukkusulersinnaavaat. Tamatuma nassatarissavaa Kalaallit Nunaanni aningaaseriviit taarsigassarsisitsisarnerminni siumut ingerlanertik annikillisittariaqalissavaat, Kalaallit Nunaanni inuiaqatigiinnut aningaasarsiornikkut ajoqutaasumik annertuumik ajoqusiinermik malitseqartumik.

Danmarkimi aamma Kalaallit Nunaanni aningaaseriviit akornanni qularnaveeqqusiinermi aningaasat amerlassusiisa assigiinngissutaat qulaani taaneqartut atuutilernissaannut ulloq killissarititaasoq tassaassaaq 30. september 2010. Taamaattumik aaqqiissutip atuuttup allanngortinnissaata atuutsilernissaa, taamaalilluni assigiinngissutit nikinganeerullutik, ulloq taanna nallertinnagu pisariaqarpoq.

Taamaalilluni aalajangiiffigisassatut siunnersuut Inatsisartuni sammeqqinneqarnissaa ingerlatinneqarpoq.

